



La bova da Bondo da l'avust 2017 ha chaschunà 8 victimas.

FOTO ARCHIV SOMEDIA

Bova da Bondo saja stada previsibla

Dumonda da responsabladad

■ (rtr/fmr) La bova ch'è vegnida giu avant quatter onns a Bondo dat vinavant da discourrer. Uss vegn tractada la dumonda, sch'ins avess stui savair quant privlusa che la costa sut il Cengalo era. La bova da Bondo da l'avust 2017 che ha chaschunà 8 victimas, saja stada previsibla. In geolog extern engaschà dal chantun per observar il Cengalo haja gia 10 dis avant la catastrofa scrit in mail a l'Uffizi da guaud e privels da la natira ch'i saja da quintar cun ina bova. Quai scriva il Beobachter en sia edizium actuala. En il mail dal geolog extern stat scrit vinavant ch'el cusseglia d'installar in radar per observar il Cengalo e da serrar la via da viandar tras la val Bondasca. Pauc pli tard èn represchentants dal chantun sco er il geolog extern che aveva averti il chantun, sgulads al Cengalo per intercurir la situaziun. Il chantun ha sinquai decidì ch'i na saja tuttina betg necessari da serrar la via. Pertge quai e pertge ch'er in radar n'è betg vegnì installà na po il chantun per il mument betg responder, cunquai ch'i sa tracta dad ina procedura currenta. I resta dentant la dumonda: avess il chantun pudì evitar la mort

da las 8 persunas cun serrar en quel mument la via?

La vischnanca n'ha betg vesì il mail

En l'artitgel dal Beobachter ha la schurnalista *Stefanie Hablützel* er fatg retschertgas tar la vischnanca da Bondo. L'anteriura presidenta da Bondo e cussegliera naziunala *Anna Giacometti* na savevia nagut dal mail ed haja agì tenor l'expertisa geologica dal chantun. Sche bain ella avess cun vesair il mail serrà la via tras la val Bondasca? Quai na po nagin responder. Tge ch'è dentant uss anc da responder è, sche insatgi è responsabel per l'accident e sche gea, tgi che quai è. «La procura publica sto uss sclerir, cun resguardar tut ils fatgs, quellas dumondas – per l'ina avain nus numnadain ils dus experts dal chantun sco er il geolog che avevan enconuschientscha da quel mail, dentant er lur schefs enfin tar il cusseglier guvernativ Mario Cavigelli», di la schurnalista.

Tribunal federal dictescha

Dà l'impuls a la schurnalista *Stefanie Hablützel* da sfundrar danovamain en

las retschertgas ha ina sentenza dal Tribunal federal dal favrer passà. Il Tribunal federal pretenda en quella da la procura publica dal Grischun, ch'ella s'occupeschia anc ina giada dals eveniments al Cengalo.

La procura publica era sunter sia emprima expertisa vegnida a la conclusiun, che nagin portia la responsabladad per l'accident ed aveva mess il cas ad acta. Ils parents da las victimas da la bova da Bondo han fatg recurs cunter quella decisiun enfin al Tribunal federal e survegnerà raschun.

Sche la procura publica fa las novas examinaziuns cun ina persuna fal fatg externa n'ha ella anc betg decidì, sco ch'ella di sin dumonda. Experts interrogads en l'artitgel dal Beobachter vegnan dentant a la conclusiun, ch'i fiss necessari da laschar intercurir il cas d'ina persuna independenta.

Sco basa per metter il cas giuridi ad acta era la procura publica numnadain sa referida sin l'Uffizi per guaud e privels da la natira, il medem uffizi che aveva recumandà a la vischnanca da Bondo da betg serrar la via tras la val Bondasca.